

եւ դէմ՝ եղեալ գնայր 'ի Պտղոմայիս, Լուեալ Բդեշխին զգիստստն, արձակեաց զօրականս զլինի նորա, զի կալեալ զնա 'ի ճանապարհի դարձուցեն յետս եւ դիցեն 'ի բանտի. զինուորքն հասին առ նա 'ի լեառն Կարմելոս, և ստիպէին զնա դառնալ յետս, և նա աղաչէր զնոսա եւ յորդորական բանիւք խրատէր՝ չլինիլ պատճառ տարապարտ մահուան իւրոյ, Իսկ զինուորքն, որք յառաջագոյն քրիստոնեայ էին յազգէ Հապեշաց. զթացեալ թողին զնա երթալ յո՛ր և կամէր. եւ առեալ պարգեւ 'ի նմանէ ոսկիս 100. դարձան առ Բդեշխն և ասացին՝ ոչ կարացաք դտանել զնա, Իսկ Պատրիարքն Թէոփանէ յօսպահով հասեալ 'ի Պտղոմայիս, եւ անտի նաւեաց 'ի Կոստանդինուպոլիս, և ելեալ 'ի Կայսերական ատեանն բողոք եբարձ զգործոց Լատինաց. առաջի դնելով զհրովարտակս Սուլթանաց. և ատեանն հրամայեաց տիրել Յունաց ըստ մտաց հրովարտակաց, բովանդակ Գողգոթայի, այրին Բեթզէմի, եւ Պատանատեղոյն, և վասն այսր գրեցաւ հրովարտակ ընդարձակ՝ մինչեւ տալ գրել 'ի նմա զվանօրայս այլոց քրիստոնէից. Թէոփանէ առեալ զայն՝ դարձ արար յերուսաղէմ, արտաքսեաց զԼատինս 'ի Գողգոթայէ և յայրէն Բեթզէմի. բայց գթացեալ 'ի նոսա եթող կախել զկանթեղս 'ի վերայ Պատանատեղոյն, Իբրեւ էանց 'ի վերայ այսր ամիս իբրեւ Տ. առաքեցին Լատինք առ Վէզիրն Իպրահիմ Փաշայ քսակս դրամոց իբրեւ 16,000 դահեկան՝ և ձգեցին զնա 'ի կողմն իւրեանց. առին 'ի թիկունս զդենպետն մեծ և զայլս 'ի նախարարաց տէրութեանն, և Վէզիրն խնդրեալ յետս էառ զհրովարտակն 'ի Պատրիարքէն Յունաց, զոր տուեալ էր Սիւլէյման Արքայն որդի Սուլթան Մուրատի, և հանեալ անտի զանունն Յունաց՝ և 'ի տեղի Նորա գրեաց զանուն Լատինաց. և ետ հաստատել զայն Արքայի ձեռագրով նորին, Զի նախնին քո ասէ Սուլթան Սիւլէյման, Լատինաց պարգեւեաց զՍ. Տեղին Երուսաղէմի, և ոչ Յունաց. և այս հրովարտակ է նորա. Հաւատաց Սուլթանն, և ետ հրաման լինել այնպէս. Ընդ որ ուրախացան յոյժ Լատինք, կարծելով թէ՛ տեւական է հրամանն, և 'ի ամին ժամանակի պատրիարքն Թէոփանէ էր 'ի կողմանս Վալաքիոյ, իբրեւ լուաւ զգործս Լատինաց՝ իւր-